



Broj: 05.04-04-51929-31/24
Sarajevo, 06.01.2025. godine

SKUPŠTINA KANTONA SARAJEVO

- o v d j e -

n/r Elvedin Okerić, predsjedavajući

PREDMET: Odgovor na zastupničku inicijativu Kluba zastupnika Demokratske fronte

Veza: Akt broj 01-04-51929-31/24 od 26.11.2024. godine

Klub zastupnika Demokratske fronte, u skladu sa članom 213. stav 1. Poslovnika Skupštine Kantona Sarajevo ("Službene novine Kantona Sarajevo", br.41/12- Drugi novi prečišćeni tekst, broj 15/13, 47/13, 47/15, 48/16, 9/20, 14/20, 16/22 i 17/22- Ispravka) na 17. radnoj sjednici Skupštine Kantona Sarajevo, održanoj dana 26.11.2024. godine u okviru tačke Dnevnog reda "Poslanička / zastupnička pitanja, inicijative i odgovori", uputio je zastupničku inicijativu:

"Upućujemo hitnu inicijativu radi proglašenja epizode „Uzbuna“ zbog prekomjerno zagađenog zraka u Kantonu Sarajevo .

U zoni koja obuhvata pet općina Novi Grad, Novo Sarajevo, Centar, Stari Grad i Ilidža neophodno je hitno izvršiti primjenu interventnih mjera.

Obrazloženje:

Epizodu „Uzbuna“ proglašava Vlada Kantona Sarajevo na prijedlog Ministarstva komunalne privrede, infrastrukture, prostornog uređenja, građenja i zaštite okoliša Kantona Sarajevo zasnovanom na izvještaju Stručnog tijela, ako su ispunjeni sljedeći uslovi:

- Izmjerene koncentracije jedne ili više zagađujućih materija u zraku na najmanje jednoj referentnoj stanici su jednake ili prelaze prag uzbune,
- Ako se u narednih 48 sati očekuje stabilna vremenska situacija koja pogoduje daljnjem akumuliranju zagađujućih materija u zraku.

Na mjernoj stanici Otoka je tokom dva prethodna dana izmjerena srednja dnevna vrijednost PM₁₀ iznad praga uzbune, uz vremensku prognozu koja je sljedećih 48 sati predviđjala stabilno vrijeme."

Odgovor :

Povodom pokrenute Inicijative, koja je zaprimljena u Ministarstvu dana 04.12.2024. godine, obavještavamo o sljedećem:

U skladu sa tačkom 2. poglavlja VI Plana interventnih mjera u slučajevima prekomjerne zagađenosti zraka u Kantonu Sarajevo" („Službene novine Kantona Sarajevo“ br. 49/23 i 50/23- Ispravka) (u daljem tekstu: Plan), epizodu „Uzbuna“ Odlukom proglašava/ukida Vlada Kantona Sarajevo, na prijedlog Ministarstva komunalne privrede, infrastrukture, prostornog uređenja, građenja i zaštite okoliša (u daljem tekstu: resorno ministarstvo) zasnovanom na izvještaju Stručnog tijela za koordinaciju i nadzor (u daljem tekstu: Stručno tijelo).

Stručno tijelo, koje čine predstavnici iz resornog ministarstva, Službe za protokol i press Kantona Sarajevo, Zavoda za javno zdravstvo Kantona Sarajevo, Federalnog hidrometeorološkog zavoda, te stručna lica iz oblasti zaštite zraka, prilikom odlučivanja razmatra vremensku prognozu za tri dana koju Federalni hidrometeorološki zavod dostavlja svakodnevno, te izvještaj o 24-satnom prosjeku koncentracija zagađujućih materija u zraku.

Zadatak Stručnog tijela je, između ostalog, da procjenjuje mogući scenarij trajanja epizoda povišenih koncentracija polutanata u zraku, a na raspolaganju su mu detaljniji podaci, koji nisu od interesa za širu javnost i ne nalaze se u zvaničnoj prognozi, kao npr. visina inverzionog sloja, visina vazdušnog strujanja, vrijednosti atmosferskog pritiska i sl., a na osnovu kojih se može sa većom sigurnošću procijeniti mogućnost nakupljanja zagađujućih materija, njihovog zadržavanja ili čišćenja područja Kantona. U tom smislu, ponekad se epizode proglašavaju/ukidaju, iako naizgled nema uslova za to. Stručno tijelo kontinuirano prati vrijednosti koncentracija zagađujućih materija, te kada je potrebno u toku dana se više puta radi 24-satni prosjek istih, uz provjeru vremenskih uslova.

U konkretnom slučaju, 27.11.2024. godine, kada je upućena inicijativa, vrijednosti koncentracije lebdećih čestica PM₁₀ na Otoci su zaista prešle prag za proglašenje epizode Uzbuna. Međutim, Stručno tijelo je procijenilo, da epizodu ne treba proglašavati, jer je sinoptička prognoza ukazivala da bi ubrzo trebalo doći do pada koncentracija, pri čemu je uzeta u obzir i okolnost, da je na čitavom području Kantona bila na snazi epizoda Upozorenje, koja je podrazumijevala primjenu trinaest mjera/aktivnosti u cilju smanjenja emisija i zaštite zdravlja ljudi. Da je procjena Stručnog tijela bila dobra, pokazuje činjenica, da je došlo do čišćenja kotline u potpunosti, te je dana 29.11.2024. godine ukinuta epizoda Upozorenje.

Želimo istaći, da se donošenju odluke o proglašenju epizode prekomjerne zagađenosti zraka pristupa odgovorno, jer su mjere/aktivnosti koje se pokreću po svojoj prirodi restriktivne i zahtijevaju angažovanje velikog broja resursa, a često u javnosti izazivaju negodovanje, iako se primjenjuju u cilju zaštite zdravlja stanovništva.

S poštovanjem,

PO OVLAŠTENJU MINISTRA
ŠEF KABINETA

Dostaviti:

- Naslovu
- Služba za skupštinske poslove Kantona Sarajevo
- Stručnoj službi Vlade Kantona Sarajevo
- a/a

